

**Uunga siunnersuut: Kommunit Namminersorlutillu Oqartussat missingersuutaat
naatsorsuutaallu pillugit Inatsisartut inatsisaata allanngortinneqarnissaa pillugu
Inatsisartut inatsisaat**

(Teknikikkut naleqqussaait, Kommunit immikkoortunut pilersaarutaat kiisalu Piffissaq
ungasinnerusoq eqqarsaatigalugu aningaasaliissuteqarnissamut Aningaasaateqarfimmut
nuutsisarneq)

Aningaasaqarnermut Akileraartarnermullu Naalakkersuisumit saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Asii Chemnitz Narup, Inuit Ataqtigiit, siulittaasoq

Inatsisartunut ilaasortaq Jens Frederik Nielsen, Demokraatit, siulittaasup tullia

Inatsisartunut ilaasortaq Peter Olsen, Inuit Ataqtigiit

Inatsisartunut ilaasortaq Mariia Simonsen, Inuit Ataqtigiit

Inatsisartunut ilaasortaq Kuno Fencker, Siumut

Inatsisartunut ilaasortaq Karl Tobiassen, Siumut

Inatsisartunut ilaasortaq Jens Napaattoq, Naleraq, Knud Mathiassenimut sinniisoq, Attaviitsoq

UKA 2023-mi ulloq 4. oktober siullermeerinninnerup kingorna ataatsimiititaliap sunnersuut
misissorpaa.

1. Siunnersuutip imarisaa siunertaalu

Siunnersuut kommunit Namminersorlutillu Oqartussat missingersuutaat naatsorsuutaallu
pillugit Inatsisartut inatsisaanni allannguutitut arfineq marlunnut tunngavoq.

Siunnersuummi immikkoortut pingaarnerit ilaatigut kingunerivaat tunissutit tapiissutillu mis-
singersuutit inissisimanerannik naatsorsuinerimi ilaannginnissaat, sinneqartoorutinik Piffissaq
ungasinnerusoq eqqarsaatigalugu aningaasaliissuteqarnissamut Aningaasaateqarfimmut nuus-
sinissap piffissaanik kinguartitsisinnaaneq, ukiumoortunik naatsorsuutiginik akuersissutigini-
ninnissamut kommuninut piffissaliussap 15/9-mut allanngortinnera kiisalu kommunit immik-
koortunut pilersaarutaat pillugit nalunaarusiornissamut Naalakkersuisut piginnaatinneqarnerat.

Siunnersuutip Inatsisartut inatsisaata atornerqarnerani periuserineqartuni misilittakkat ersersikkai siunnersuuteqartumit oqaatigineqarpoq. Taamaalilluni teknikkkut siunnersuut annertuumik allannguiffiunngitsoq matumani pineqarpoq.

2. Siunnersuutip Inatsisartunit siullermeerneqarnera

Siullermeerinninnermi siunnersuut nalinginnaasumik taparserneqarpoq. Pissutsillit aalajangersimasat paasinarsisinneqarnissaat kissaatigineqarpoq, taamaattumillu immikkoortoq ataatsimiititaliamit suliarineqartussanngorlugu innersuunneqarpoq.

3. Tusarniaanermut akissutit

Siunnersuut piffissami 2023-mi 29. junimit 17. julimut tusarniaassutigineqartoq Naalakkersuisut paasissutissiisutigaat. Tusarniaanermut akissutit tiguneqartut tunngavigalugit Naalakkersuisut tusarniaanermut allakkiamik suliaqarput, taannalu inatsisissatut siunnersuummut ilanngussatut ilanngunneqarsimavoq.

4. Siunersuineq

Ataatsimiititaliap siunnersuummik suliarinninnerani atugassatut kisitsisitigut paasissutissat Aningaasaqarnermut Akileraartarnermullu Naalakkersuisumut ataatsimiititaliamit ujartorneqarput. Ataatsimiititaliap allagaa aammalu Aningaasaqarnermut Akileraartarnermullu Naalakkersuisup akissutaa isumaliutissiisummut matumunnga ilanngussatut ilanngunneqarput. Tamatuma inerneratut allannguutissatut siunnersuutip danskisuuata kalaallisuuatalu imminnut naapertuutilernerannik imaqartumik iluarsisummi nutaamik saqqummiussinissaq Naalakkersuisut malippaat.

5. Ataatsimiititaliap siunnersuummik suliarinninnera

Siuliani oqaatigineqartutut siunnersuummik siullermeerinninnermi siunnersuut matumani pineqartoq nalinginnaasumik taparserneqarpoq. Tamatumalu peqatigisaanik siunnersuummi pissutsit ilaat erseqqinnerusumik paasinarsisinneqarnissaat ujartorneqarpoq.

- Tamatumani assersuutigalugu pineqarpoq siunnersuummi § 1, imm. 3, tamatumani siunnersuutigineqarluni § 12, imm. 1-imi oqaaseqaatigiit aappaanni oqaatsip ”nalinginnaasumik” ilanngunneqarnissaa.
- Aamma pineqarpoq siunnersuummi § 1, imm. 5, tamatumani siunnersuutigineqarluni kommunit immikkoortunut pilersaarutaat pillugit nalunaarusiornissamut Naalakkersuisut piginnaatinneqassasut. Namminersorlutik Oqartussat immikkoortunut pilersaarutaasa kommuninut ataqatigiissaarneqarnissaannut tunngavissinissap qulakkeerneqarnissaa siunnersuuteqarnermi siunertaavoq.

Tamanna ataatsimiititaliamit ima paasineqarsinnaavoq; immikkoortuni siuliani allassimasuni siulleg naammattumik paasinarsisinneqarsimanngitsoq.

Immikkoortup aappaanut tunngatillugu ataatsimiititaliamit paasineqarpoq aalajangersagaq taamaattoq kommunit immikkut artukkerneqarnerannik kinguneqassanersoq nalornissutigine-

qartoq.

Taamaattumillu nalornissutit taakku marluk akissuteqarfigeqqullugit Naalakkersuisut ataatsimiititaliamit kaammattorneqarput. Tamanna pisinnaavoq siunnersuutip aappassaaneerqarnissaanut Naalakkersuisut akissuteqaataanni.

Naalakkersuisut 16. oktober siunnersuummut matumani pineqartumut allannguutissatut siunnersuummik saqqummiussipput. Allannguutissatut siunnersuutikkut immikkoortumik nutaamik ilanngussisoqarpoq, taanna malillugu Inatsisartut inatsimmik akuersinerisa kingunerisaanik kommuninut aningaasartuutaanerussutissatut naatsorsuutigisat Namminersorlutik Oqartussat missingersuutaasa inissisimanerannik naatsorsuinermi ilanngullugit naatsorsuuneqassapput. Siunnersuut namminermi aningaasaqarnikkut kinguneqanngilaq, kommunilli aammalu Namminersorlutik Oqartussat missingersuutaasa inissisimanerisa naatsorsorneqarnerannut sunniuteqarluni.

6. Siunnersuutip aningaasaqarnikkut allaffissornikkullu kingunerisassai

Siunnersuutip aningaasaqarnikkut kingunerisassai siunnersuummut nalinginnaasuni nassuiaatini allaaserineqarput. Ataatsimiititaliaq allanik oqaaseqaatissaqanngilaq.

7. Ataatsimiititaliap inassuteqaatai

Naalakkersuisut allannguutissatut siunnersuutaat **akuerineqassasoq ataatsimiititaliap isumaqatigiittup** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Asii Chemnitz Narup
Siulittaasoq

Jens Frederik Nielsen
Siulittaasup tullia

Karl Tobiassen

Mariia Simonsen

Kuno Fencker

Peter Olsen

Jens Napaattoq